

DEVOZIUN DE CARSËMA TE CIASA

***"Deache Idî ne s'á nia dé a nos n spirit dla pisima,
mo le Spirit dla forza, dl amur y dla sapiënza." (2 Timoteus 1,7)***

Cun chëstes parores ti dá l'apostul Paul coraje a so scolar Timoteus y tl medemo tēmp nes renforzel y nes incorajēiel ince nos.

I s'un abiné chiló a perié deboriada:

Tl inom dl Pere y dl Fi y dl Spirit Sant. Amen.

Dal baié dla jënt aldiunse gonot fora deplü pisima y tēma co forza y sapiënza. Al n'é de chi che á de gragn dübi. An vëiga ch'al n'é cotanc che se rassegnëia y devënta passifs. Y ince tla comunité dla dlijia él tröc credënc che se sint malsigüsc.

Co m'astili pa iö te chësta situaziun che me dá bindebó da pönsé?
Ci pói pa iö fá personalmēter por superé chësta crisa?
M'intēni tan comples che döt é, y sái te ci vers ch'i dess me möie?
Da olá toli pa la forza por mia misciun y mi compit?
Co feji pa iö da vire coscientamēter cun döt ci che me toma ados?
Ci spirit y ci desposiziun oressi pa ch'al foss te nosta comunité?

Chëstes y d'atres domandes él che nes vëgn imēnt sc'i conscidrun la situaziun te chëra ch'i viun. La racomanaziun dl apostul Paul tla secunda lëtra a Timoteus pó nes daidé da ciafé n orientamēnt:

Periun: (chît)

Signur Gejú Crist,
te tües parores nes baia ados le Spirit creatif de to y de nosc Pere tl cil.
Tö conësces le ri spirit che nes tormentëia y nes tol la buna vöia.
Ví tö instës amesa nos ite a nes animé cun to fle.
Tö nes inviēies pö da ciafé tria y palsa pro te y da tó forza nöia da túa presënza.
Láscesse sintí la faziun de to bun Spirit y odëi olach'al operëia inclunch.
Deuresse les orëdles da aldí y capí ci che to Spirit ó nes aconsié y nes mostré,
ci poscibilités ch'al ó nes daurí y ci ch'al ó nes scinché.
Dásse le fle ch'i adorun por avëi le coraje y la paziënza da afronté ci che vëgn ghiré da nos.

Dala secunda lëtra a Timoteus (1,6-11)

I t'al recordi:

*Descëda indô la grazia de Dî,
che t'é gnüda dada por l'imposiziun de mies mans.
Deache Idî ne s'á nia dé a nos n spirit dla pisima,
mo le spirit dla forza, dl amur y dla sapiënza.
No te dodé da testimonié por le Signur;
no te dodé gnanca por me ch'i sun por ël te porjun,
mo sofrësc cun me por le vangele.
Idî dá la forza. Ël nes á salvé.
Cun na vocaziun santa nes ál cherdé,
nia por nostes opres, mo por süa dezijiun y por grazia,
chë grazia, che nes é bele dal'eternité incá
gnüda scincada te Gejú Crist;
mo pormó sëgn éra gnüda manifestada
cun l'apariziun de nosc Salvatur Gejú Crist.
Al ti á tut la potënza ala mort
y nes á porté la löm dla vita imortala tres le vangele,
por chël ch'i sun gnü istituí sciöche incundadú, apostul y maester.*

Lalt y reingraziamënt:

Bel Dî, te tûa fedelté,
aste cherié le cil y la tera y vigni porsona do tûa somëia.
Te dôtes tûes creatôres se respidlëia tûa belté y tûa grandëza.
Plëgns de morvëia stunse dan da dôtes tûes opres.

I te laldun y te dijun dilan.

Bel Dî, te to amur,
este diventé te Gejú Crist porsona umana
y t'as tut sôn te la deblëza y la fragilité de nosta esistënza umana.
Da dailó incá rieste y piteste, dormeste y somiëieste, vireste y patësceste
cun vignun y vignöna di fis y dles fies de tûa jënt sôn chësta tera.

I te laldun y te dijun dilan.

Bel Dî, te to operé,
nes aste soflé ite to Spirit.
Tla forza de to Spirit nes mantëgneste en vita.
Te ne s'as nia dé a nos n spirit dla pisima,
mo te nes as metü tl cör le Spirit dla forza, dl amur y dla sapiënza.
Da süa plenëza podunse ciarié fora tres danü
y porté pro creativamënter al renovamënt de chësc monn,
cun les scincundes desvalies de to Spirit che te nes as scinché en abundanza.

I te laldun y te dijun dilan.

Döt le lalt y l'onur, dôta l'adoraziun y la gloria te speta a te,
oh dër Dî, etern y viënt.
Porchël proklamunse tûa santité,
Dî trinitar: Pere y Fi y Spirit Sant.

Litánia do les scincundes y les forzes dl Spirit Sant

Ví, tö Spirit Sant,
- te nüsc cörs y te nüsc pinsiers
- te nostes reflexiuns y confertes
- te nostes reuniuns y proietaziuns
- te nüsc fistidi plëgns de tëma
- te nostes malsegurëzes
- te nostes domandes davertes
- te nostes delujiuns y sc'i se blocun.

Operëia tö, Spirit Sant,
- te dôtes nostes incuntades
- te nosc ascuté la parora de Dî
- te nosc perié y festejé
- tres nosc impëgn
- tres i sëgns de nosc tëmp
- te nostes forzes y limitaziuns
- tres tûes scincundes desvalies.

Dëida tö, Spirit Sant,
- olach'i ne savun nia da tó aiüt y consëi
- sc'i ne savun nia plü co inant
- sc'i sun ala fin de nostes forzes
- cun la forza de tûa essënza
- te nüsc vari pesoc
- te nüsc dübi y nostes pisimes
- te nostes strentôres y tëmes.

Desliëia tö, Spirit Sant,
- nostes tenjiuns
- nüsc grops
- nostes fissaziuns
- nosta impotënza che nes arfera
- la surdité de nüsc cörs
- nostes ghiranzes fora de mosöra
- nosta vijiun strënta

Oraziun:

Ví, Spirit Sant, cun tûa forza che nes liëia adöm y cheriëia vita.

Ch'i conesciunse cun to aiüt ci che é important.
Ch'i odunse te tûa löm ci ch'i dessun fá o lascé.
Ch'i diventunse cun tûa assistënza testemoni credibli.

Ví, Spirit Sant, cun tüa forza che nes liëia adöm y cheriëia vita.

Ch'i gnunse animá y renforzá da tüa forza divina da jí por nosc tru.
Ch'i adempliunse nosc compit y ti junse do a nosta vocaziun.
Implëscesse cun to fle! Renforza nosc anim! Agüza nüsc sënsc!

Ví, Spirit Sant, cun tüa forza che nes liëia adöm y cheriëia vita.

Zënza sunse massa debli.
Zënza junse damat y se pordunse, tomunse y s'intravaiunse te imaginaziuns falzes.
Zënza ne ti metunse nia averda a tü consëis y a tües ispiraziuns.

Ví, Spirit Sant, cun tüa forza che nes liëia adöm y cheriëia vita.

Por ch'i ciariunse fora dl'abondanza de tüa fedelté y dunse inant ci ch'i cïafun da te.
Por ch'i se lasciunse renforzé da tüa parora, incorajé y consolé, mo ince mené y condüje.
Por ch'i ti respognunse a tüa parora, sciöche Maria l'á fat.

Ví, Spirit Sant, cun tüa forza che nes liëia adöm y cheriëia vita.

Deache tres te nes vëgnel juté te nüsc cörs la vita y la forza dla grazia
che nes dëida da sté ite y se dé da fá cun tües scincundes y facoltés desvalies.

Ví, Spirit Sant, cun tüa forza che nes liëia adöm y cheriëia vita.

Insciö este spëisa de nosta speranza, fontana dla paziënza y dla ligrëza,
sostëgn tles tentaziuns y ti prighi, por ch'i podunse se lascé sön te pro döt ci ch'i tolun tles mans.
Insciö podunse s'araté y se sintí sciöche to popul sön tru, sciöche tüa Dlijia peregrina,
y ester se dla tera y löm dl monn te chësc nosc tëmp.

Ví, Spirit Sant, cun tüa forza che nes liëia adöm y cheriëia vita.

Spo podunse vire confidënc y tó pert ala costruziun de to rëgn de iustizia, de amur y de pesc.
Spo poste renové tres nos le müs dla tera sëgn y por düc i dis de nosta vita.

Benedisciun:

Insciö nes benedësces le Signur cun süa grazia,
süa bunté y fedelté, süa vijinanza y so amur
sön nüsc trus nüs, por ch'i la vagunse da jí.

**Insciö nes benedësces le Signur cun süa parora,
cun sües mans y sü edli,
cun sü nunziadus y sü sëgns.**

Insciö nes benedësces le Signur cun süa forza,
tles tröpes domandes y chestiuns davertes,
te döt ci che nes tormentëia y nes pësa.

**Insciö nes benedësces le Signur cun so Spirit
te döt por ci ch'i l'adorun y le periun.**

Insciö nes benedësces le Signur te döt
ci ch'i metun man te so inom y sun bugn d'arjunje,
ince pro ci ch'i lasciun ia y lasciun ester.

**Insciö nes benedësces le Signur te döt
ci ch'i fajun a so onur y por le bëgn dla jënt.**

Insciö nes benedësces le Signur te süa paziënza,
te süa crëta frëma te nos y te so gran fistide.

**Insciö nes benedësces le Signur vigni de danü,
da vigni scomenciamënt y da vigni contlujun.**

Insciö nes benedësces le Signur da ciaré plü inant
y da odëi plü sot, da ester frëms y da ester saurisc,
da avëi fidënza, buna vöia y prudënza.

**Insciö nes benedësces le Signur te dötes
les situaziuns dla vita, tles ores bunas y ries,
tles beles incuntades y tles stletes relaziuns,
tla fortuna y tl dolor.**

Insciö nes benedësces le Signur cun tóta
la benedisciun de so Spirit y cun l'abondanza
des sües scincundes.

**Insciö nes benedësces le Signur cun baldëza
sarëna, cun na buna sanité, cun na gran forza
da tigní fora, cun tröpa dorada
y cun la presënza de so Spirit.**

Insciö nes benedësces Idí onipotënt,
le Pere y le Fi y le Spirit Sant.